

四庫全書

子部

欽定四庫全書

子部

欽定協紀辨方書

御製序  
奏議目錄

詳校官中書<sub>臣</sub>張經田

靈臺郎<sub>臣</sub>倪廷梅覆勘

總校官知縣<sub>臣</sub>楊懋珩

校對官主事<sub>臣</sub>曾廷灃

謄錄監生<sub>臣</sub>王淦

欽定四庫全書

御製協紀辯方書序

粵昔帝堯命羲和敬授人時厥民知析因夷隩之節後  
聖有作推而彌廣至於外事用剛日內事用柔日此皆  
載之經典百王不易者也厥後濫觴日以訛謬術士以  
吉凶禍福之說震驚朕師不可方物如褚少孫補史記  
所稱彼家云吉此家云凶彼家云小吉此家云大凶茫  
乎不知其畔岸漢武以來已如聚訟而荀悅王充輩斥

為理之所無弃而勿論者也雖然天以日月行四時人  
奉天而時若嚮明而治嚮晦而息后王君公所以奉若  
天道也日出而作日入而息羣黎百姓所以奉若天道  
也否則不能晨夜不夙則暮詩人譏焉人人所知也然  
則舉大事動大衆協乎五紀辨乎五方以順天地之性  
豈無寸分節解以推極其至精至微之理者歟其支離  
蒙昧拘牽謬悠之說乃術士之過而非可因噎而廢食  
者也欽天監舊有選擇通書刻於康熙二十二年其書

成於星官之手因訛襲謬見之施行往往舉矛刺盾  
皇祖聖祖仁皇帝知其荒率不可以訓曾纂為星厯考原一  
書刊刻頒行而未將監本改正蓋以待夫後人

聖人之心慎而又慎如此也以諭監臣監臣曰通書之謬允  
宜改正朕因其請謂及今猶有莊親王等數人曾經

皇祖指授稍明此理使此時不加訂正恐後此益復無可任  
使爰命編輯成書頒布天下較之舊本謬說少除然俗  
所久沿則亦不能盡去便民用也命名曰協紀辨方書

夫協紀辨方者敬天之紀敬地之方也一作止一語默  
天地實式臨之况其大乎如曰如是則吉如是則凶如  
是則福如是則禍則明者所弗道也雖然敬不敬之間  
吉凶禍福隨之矣是為序

乾隆六年十二月望日

奏議

欽天監監正兼佐領臣進愛謹

奏為請

旨重修選擇通書萬年書以昭畫一以垂永久事竊惟  
陰陽選擇書籍繁多彼此參差最難考定康熙二  
十二年

聖祖仁皇帝

特命九卿詹事科道會議照依前定選擇通書萬年書遵

行仍取通書大全內二十四條附入選擇通書彙  
為一部與萬年書一同永遠遵行臣監遵奉編校  
繕成十卷擬名

欽定選擇通書進呈

御覽奉

旨依議欽遵在案惟是從來選擇諸書皆未考究根源臣  
監當年編校亦止照依舊本

聖祖仁皇帝道通法象學貫天人康熙五十二年



大內蒙養齋開局

命和碩莊親王率同翰林何國宗梅穀成等恭編

御製算法律呂諸書併發曹震圭所著歷事明原著同大學士李光地重加考訂

親加披覽

賜名御定星歷考原

頒賜臣監臣等欽遵考校始知從前選擇通書內尚有傳謬即萬年書與選擇通書亦未畫一除時憲書紀

年九宮已奉

特旨改正外其餘參差錯誤之處甚多因係久經九卿定議遵行之書未敢遽議更改今臣監開設增修時憲算書館和碩莊親王現在總理梅殷成何國宗現在總裁臣蒙

皇上天恩特授監正職叨協理館事所有臣監選擇通書萬年書參差錯誤之處應請一併考訂重修庶可昭畫一而垂永久倘蒙

皇上恩准請以梅穀成何國宗為總裁臣監監副李廷  
耀專司選擇請以為副總裁再量選臣監通曉選  
擇官生十員分修校錄除現今在館各員已蒙  
聖恩賞給桌飯銀兩外其餘亦請照例支給應用紙張  
等項照例該處支取書成之日進呈

御覽恭請

欽定一併交

武英殿刊刻頒行所有應改條目關係神煞及合婚

俗論應行刪去之處臣監未敢擅便謹另單臚列  
伏乞

皇上睿鑒勅部定議臣監遵奉施行為此謹  
奏請

旨

計開

一天德乃月建三合五行中和之氣孟月用陰干  
季月用陽干仲月用庫宮如申子辰月三合水局

申孟月以癸為天德辰季月以壬為天德子仲月以巽為天德水庫在辰屬巽宮也天德不用地支故不用辰而用巽通書子月己月誤載天德宜改

正

一月恩乃月建所生之氣陽月生陽干陰月生陰干通書五月丙戌日十二月甲子日誤載月恩宜改正

一喜神乃取時干見丙如甲日丙寅時則以寅時

為喜神論方向則以寅屬艮即以艮方為喜神是  
方向原從時起通書以丑寅皆屬艮誤以甲日丑  
時亦為喜神逐日皆誤俱宜改正

一復日乃月建所同之干如正月建寅為陽木而  
甲亦陽木故正月以甲日為復日七月建申為陽  
金而庚亦陽金故七月以庚日為復日世俗作為  
歌訣云正七連庚甲通書因誤以正月之庚日七  
月之甲日皆為復日逐月皆誤俱宜改正

一九空乃月建三合庫地對衝之日如寅午戌月  
合火局火庫在戌故以辰日為九空通書九空誤  
為寅午戌月辰卯寅日卯未亥月丑子亥日辰申  
子月戌酉申日巳酉丑月未午巳日俱宜改正

一大敗乃月建三合五行沐浴如寅午戌月合火  
局火長生在寅沐浴在卯故寅午戌月以卯日為  
大敗日通書誤以春卯夏午秋酉冬子為大敗日  
俱宜改正

一蠶官蠶室蠶命乃取歲方生養之地如歲在東方寅卯辰屬木木養于戌為蠶官生于亥為蠶命乾在戌亥之間為蠶室通書蠶命惟寅午二年合餘年俱誤宜改正

一男女合婚以生命之九宮配卦爻之變動六爻不動為歸魂一爻變為五鬼二爻變為福德三爻變為絕體四爻變為天醫五爻變為生氣游魂卦為游魂歸魂卦為絕命牽合非倫至年命神煞雖



亦附會五行然非祿命之理如以年命之納音五行生于死墓絕之三月為男妨妻女妨夫尤屬妄誕愚民拘牽俗論往往婚姻失時應請刪去

一紅沙日忌嫁娶上兀下兀四不祥日忌上官選擇通書皆不載萬年書亦不載紅沙臣監舊例註

時憲書時按期添入查紅沙乃己酉丑金局日孟月己日仲月酉日季月丑日相傳又誤以為孟月酉日仲月己日甚屬無當上兀下兀乃俗傳小六

壬之留連赤口日陽年正月初一日起小吉陰年正月初一日起留連按日順數尤為荒陋四不祥乃從朔日取對七為衝隔三為破自初一順數初四日為隔三初七日為對七十六日又為隔三十九日又為對七二十八日又為隔三故皆為四不祥日不論月建與干支而以月朔定衝破甚屬不經應請一併刪去等因于乾隆四年七月二十七日交與奏事郎中張文彬等轉奏本日奉

旨該部議奏欽此

禮部謹

題為遵

旨議奏事該<sub>臣</sub>等議得欽天監監正進愛條奏重修選  
擇通書萬年書以昭畫一以垂永久一摺據進愛  
奏稱從來選擇諸書皆未考究根源<sub>臣</sub>監當年編  
校亦止照依舊本康熙五十二年

命和碩莊親王等恭編

御製算法律呂諸書

賜名御定星歷考原

頒賜臣監臣等欽遵考校始知從前選擇通書內尚有傳  
謫即萬年書與選擇通書亦未盡一除時憲書紀  
年九宮已奉

特旨改正外其餘參差錯誤之處甚多因係九卿定議遵  
行之書未敢遽議更改今臣監開設增修時憲算  
書館和碩莊親王現在總理梅穀成何國宗現在

總裁所有選擇通書萬年書參差錯誤之處應請  
一併考訂重修請以梅穀成何國宗為總裁監副  
李廷耀專司選擇請以為副總裁再量選臣監通  
曉選擇官生十員分修校錄除現今在館各員已  
蒙賞給桌飯銀兩外其餘亦請照例支給應用紙  
張等項照例該處支取書成之日交  
武英殿刊刻頒行所有應改條目關係神煞及合婚  
俗論應行刪去之處另單臚列伏乞

皇上睿鑒勅部定議等語查選擇通書紀陰陽之正協剛柔之宜究象數本原以順時趨事載入時憲昭示萬方誠宜考校精詳歸於至當今該監既稱尚有參差錯誤之處應仍請

勅交總理增修時憲算書館和碩莊親王總裁梅穀成何國宗等一併考訂重修至稱監副李廷耀專司選擇請以為副總裁等語查監正進愛現在協理館事監副李廷耀選擇既係專司自宜令其協同

辦理其請以為副總裁之處無庸議至分修校錄不可乏員應如所請令該監於通曉選擇之挈壺正博士天文生挑取十員其桌飯銀兩併應用紙張等項照該館例支取報銷所有單內應改條目交與該館詳核訂正務於畫一可垂永久書成之日進呈

御覽恭候

欽定一併交與

武英殿刊刻頒行可也等因於乾隆四年八月二十  
六日題本月二十九日奉

旨依議欽此

總理增修時憲算書館事務和碩莊親王臣允祿謹

奏為請

旨事竊臣館奉

旨重修萬年時憲書選擇通書務期考據精詳校訂明  
確方可昭示天下垂諸永久但神煞宜忌各有根



源而諸本吉凶多相矛盾臣等現將各神宜忌之事與各事宜忌之神悉心參互考訂正其譌謬去其重複分派在館各員重加修註此外根據未詳彼此互異之處尚多查內閣學士張照學問淹博家多藏書且素日亦留心神煞選擇之事伏乞

皇上天恩准令張照兼臣館總裁行走遇有考訂之處與梅穀成何國宗一同商酌辦理於臣館事務實有裨益為此謹

奏請

旨等因於乾隆五年二月初九日交與奏事郎中張文彬等轉奏本日奉

旨好欽此

總理增修時憲算書館事務和碩莊親王臣允祿等謹奏為請

旨事竊臣館奉

旨重修選擇通書萬年書先據欽天監監正臣進愛奏

稱應改條目關係神煞及合婚俗論應行刪去之處另單臚列伏乞

皇上睿鑒勅部定議經禮部議覆單內應改條目交與該館詳核訂正務歸畫一可垂永久奉

旨依議欽此欽遵臣等謹按圖書為五行生尅之原卦疇為吉凶變化之本聖人作卜筮以前民用即選擇之道所由昉也術數之家更相推行神煞之名愈多而選擇愈無準的恭查康熙二十二年為葉

鍾龍誣告王府動土一案奉

聖祖仁皇帝諭旨陰陽選擇書籍浩繁吉凶禍福多相矛盾且事屬渺茫難以憑信若各據一書偏執已見捏造大言恣相告訐將來必致誣訟繁興作何立法永行無弊著九卿詹事科道會同確議具奏欽此

聖言煌煌萬世為則矣但當時定議之臣雖經刪其矛盾而尚多未盡應用神煞亦未考據本原臣等悉心考訂務求其理而得其合正其舛誤加之解說因

見其荒誕錯誤尚有出於臣進愛所奏之外而必不可不改者春秋傳云國之大事在祀與戎今通書祭祀用神在日查所謂神在日者全無理解及檢道藏乃云許真君奏玉帝而定之荒誕已甚通書出軍忌九醜日今查九醜出於六壬凡十日每日各有一時為九醜乃選時之法而通書誤以選時為選日大事尚然其小者又無論矣他如嫁娶周堂五姓修宅之類悉屬荒唐謬說而載在時憲

書內又如天德月德乃上吉之日諸事皆宜今註  
時憲書天德日止宜修造動土月德日止宜修造  
動土宴樂上官殊於名義不合其餘吉凶宜忌亦  
多類此茲當奉

旨重修之時臣等又經查出自應一併釐定昔年時憲  
書內九宮錯誤

聖祖仁皇帝特諭欽天監具題改正有例可循但事重司  
天議須衆允且於時憲書內多所更定大典攸關

臣等謹將一切應刪應改之處與欽天監官員公  
同商酌另單開列恭呈

御覽伏乞

皇上睿鑒勅下大學士九卿定議施行臣等未敢擅便  
為此謹

奏請

旨

計開

一時憲書載五姓修宅以五音分五姓始於漢時  
識緯之說託之孔子歷代以來諸儒駁論不勝枚  
舉即使其說果是則自今日以溯黃帝民間姓氏  
屢改豈能猶合本音況實無義理徒滋拘忌應刪  
去

一男女合婚臣進愛已經奏請刪去至其嫁娶大  
利月及周堂日亦屬不經皆術士之妄說也查大  
利月以女命為主陽年本命前一月陰年本命後



一月為大利次月妨媒次月妨翁姑次月妨女父  
母次月妨夫次月妨女本身惟妨本身月為女之  
本命與其對衝然選擇亦無專取本命年支一字  
之例餘更無義可推至于周堂載在時憲書以乾  
為翁坎為第艮為竈震為婦巽為廚離為夫坤為  
姑兌為堂大月從夫順數小月從婦逆數遇第堂  
廚竈為吉遇翁姑夫婦則妨其人並不論本命與  
日干支尤屬無理細按其圖合於儀禮成婚之次

日新婦盥饋而舅姑饗婦之位次其所為翁姑夫婦者各人所立之方向也宅與堂者宅為坎宅堂為坐西朝東之堂行禮之所古人堂室如是也有廚又有竈者廚為女氏之行廚所以饋舅姑竈為男氏之饗竈所以饗新婦婦在震方則廚竈在艮巽乃便也此豈得有吉凶生於其間耶查月有十二而忌者居其十而兩月六日中忌者又居其半是使民間可以婚嫁之日至少也不便於民莫

此為甚亦應刪去

一時憲書載太白遊方不宜抵向其法每月一日  
十一日二十一日在正東二日十二日二十二日  
在東南以次轉至東北八方既周則以九日十九  
日二十九日為在中宮十日二十日三十日為在  
天查太白星隨太陽出入前引後從總不遠離太  
陽右行太白豈能左行以算術求之萬不能符考  
其根原出於西域日時吉凶善惡宿曜經徧查釋

藏並無此經不知其出何印度但彼處以每月初  
三為一日又或以每月上弦為一日與中國朔望  
總不相合然則太白即使左行亦與中國日辰不  
同況又萬無此理應刪去

一時憲書載長星短星每月各一日八九月各二  
日無論月之大小有閏無閏每年皆然義實無謂  
曹震圭以長星為金短星為火牽合虎鼠二遁為  
之而其數仍必不能合則遷就他說以粘合之邵

秦衡以為生乎月而其說又無理之可申查長星  
短星所忌不過裁衣開市立券交易納財事既無  
關重輕世亦未嘗避忌亦毫無應驗應俱刪去

一時憲書伏斷日密日裁衣日皆以值宿起算查  
二十八宿選擇之法來自西域其伏斷以日配宿  
與旬空路空之義相似尚屬有理至所謂密日者  
乃房虛星昴四宿七政屬日西語曰密主喜事中  
國遂以其日忌安葬啟攢今查西域二十八宿分

屬七政其日各有宜忌與中國風俗迥然不同專取其密日殊屬無謂至以角亢房斗牛虛壁奎婁鬼張翼軫十三宿日為宜裁衣亦無取義應一併刪去

一時憲書以每月三日四日八日九日十日十一日十三日十四日十五日二十二日二十三日二十六日二十七日及申酉亥子日為宜洗頭日查通書被除澡雪之事用申酉亥子日其尋常洗頭

原不待擇日也況初三初四等日義亦無取應刪去

一二十八宿次舍星經天官書原係觜宿在前參宿在後選擇家以酉日值觜宿為伏斷日星命家二十八宿分配七政以日月火水木金土為序觜屬火參屬水皆依古宿次舍而定者也新法算書以參宿前一星為距星參在前觜在後則觜宿與酉日不得相值星命家以為水火顛倒查宿之距

星惟人所指與算法疎密全無關礙又七政時憲書之羅睺計都乃月行正交中交之度古以正交為羅睺新法算書以中交為羅睺星命家以為羅睺屬火計都屬土遂謂顛倒羅計查羅睺計都並非實有此星亦於字義無取於算法尤無關礙應俱依古改正

一通書時憲書推日出入晝夜時刻春秋分前後隔六度小滿小雪前後一隔九度一隔十二度冬



夏至前後隔十五度故交節氣之日無日出入晝  
夜時刻者有之今查春秋分前後隔五度小滿小  
雪前後一隔七度一隔八度則交節之日皆有日  
出入晝夜時刻于授時之義允協應改正

一通書以甲子乙丑丁卯戊辰辛未壬申癸酉甲  
戌丁丑己卯庚辰壬午甲申乙酉丙戌丁亥己丑  
辛卯甲午乙未丙申丁酉乙巳丙午丁未戊申己  
酉庚戌乙卯丙辰丁巳戊午己未辛酉癸亥三十

五日為神在日其日宜祭祀曹震圭作明原謂為唐賈耽所集曲為之解而不能通又引撮要曰舊本錯誤十有八日今依官本改正未審舊本為非新本為是選擇宗鏡則曰神無所不在以此三十五日為神在日其不在日又何在乎今徧查諸家通書皆無解說惟道藏玉匣記云許真君考天曹案簿三十一日諸神在人間地府祭祀受福餘日諸神在天求福反禍察其日數雖比通書少四日

不同九日然其為根本於玉匣記而又加之以傳  
譌亦可斷矣荒誕不經實甚宜昔人之疑而駁之  
也今現用之殊屬未合按明原引神樞經等書天  
德合月德合福德普護福生聖心續世天后天巫  
宜祭祀祈福求嗣等事較之神在日為近理應取  
天德合等日為宜祭祀其神在日應刪去

一九醜本於壬遁其法以乙卯巳卯辛卯乙酉巳  
酉辛酉戊午戊子壬午壬子十日內視丑臨於支

上則其時為九醜課推其理唯此十課魁罡及日  
干皆落敗地故謂之醜乙巳辛戌壬五干加子午  
卯酉四支共為九故曰九醜並非此十日皆為九  
醜日也今通書選時內原有九醜之說而又誤用  
之以選日則此十日內儘有吉日非盡應避忌也  
應改正

一辛未壬申癸酉己卯壬午甲申壬寅甲辰丙午  
己酉庚戌丙辰己未庚申辛酉十五日為大明日

今通書稱上吉日明原謂是李淳風所集又以丙寅丁卯戊辰己巳壬申癸酉甲戌乙亥丙子丁丑庚辰辛巳甲申乙酉戊子己丑庚寅辛卯甲午乙未戊戌己亥壬寅癸卯甲辰乙巳戊申己酉庚戌壬子癸丑甲寅乙卯戊午己未庚申辛酉三十七日為七聖日明原謂是賈耽所集七聖者黃帝元女文王周公孔子天老董仲舒也其日宜舉百事其說不倫全無義理今選擇雖不用而通書猶載

其名應刪去

一玉皇鑾駕紫微帝星紫微鑾駕北辰帝星撼龍  
帝星都天寶照都天轉運行衙帝星周仙羅星星  
馬貴人既非實有此星又且必無此理且於一帝  
星之中又有金輪火輪水輪天乙太乙諸名選擇  
宗鏡曰皆術士捏造也今通書雖載其名實不用  
以選擇應俱刪去

一逆血刃隱伏血刃千金血刃五子打劫血刃山

家火血山家刀砧或從年干起或從年支起其於  
生尅制化之理了不相干選擇宗鏡曰民間最畏  
刀砧火血術士捏造惡名以嚇人耳今選擇不用  
而通書猶載其名應俱刪去

一九良星按年周遊於井廚門路庭堂寺觀之間  
全無義理通書總論內載元朝奏罷等語今選擇  
雖不用而年局仍然開載又有暗刀煞亦是此類  
皆世俗妄說應一併刪去

一通書以本年五虎元遁甲干所臨之支為穿山大羅睺乙干所臨之支為天禁朱雀二支所夾之方為山家困龍今時憲書惟以庚辛二千所臨之支為金神並不避甲乙所有穿山大羅睺等名應刪去

一通書以驛馬前干為驛馬臨官主吉又為馬前六害主凶為凶為吉皆無義理彼此抵牾最為惑人應一併刪去



一飛天獨火又名皇天灸退通書總論已言其無  
驗而年局猶載之應併刪去

一頭白空亡八山空亡即浮天空亡八山刀砧翎  
毛禁向即坐煞向煞流財即支退舊刻彼此錯謬  
遂致異同莫辨而並列之今查明重複應刪去

一通書以月厭前一辰為章光其日忌嫁娶查嫁  
娶不將日取厭前干厭後支章光為厭前之支自  
在不用之內則章光之名亦虛設也應刪去

一天願乃十二月將以四時旺干順配之正月乙亥二月甲戌三月乙酉四月丙申五月丁未六月戊午七月己巳八月庚辰九月辛卯十月壬寅十一月癸丑十二月甲子甲乙各二者十干配十二支勢必重見十二月木將旺五氣順布而四時行且甲子干支之首十二月月之終有貞下起元之理故不用壬子而用甲子也今通書正月乙亥譌甲午四月丙申譌丙子五月丁未譌丁丑七月己

己謠甲寅八月庚辰謠丙辰十月壬寅謠戊辰十  
一月癸丑謠甲子十二月甲子謠癸未俱應改正  
一通書以春酉夏子秋卯冬午為守日春辰夏未  
秋戌冬丑為牢日原始謂守牢以字形相近而誤  
當易守日為牢日易牢日為守日今按春辰夏未  
秋戌冬丑乃四時當旺之土以為守日宜也春酉  
夏子秋卯冬午乃四時死囚之辰以為牢日宜也  
應照原始改正

一天獄天火通書載寅午戌月子日亥卯未月卯日申子辰月午日巳酉丑月酉日按原始引李鼎祚語亥卯未月當是酉日巳酉丑月當是卯日乃三合之對沖猶年之災煞也又原始以春木旺酉為牢日秋金旺卯為牢日尤與天獄名義相合至天火既以子為寅午戌火局之天火午為申子辰水局之天火則木必用酉金必用卯義例始得相符蓋天火者推其氣之根原故正以相反而互根

即陽根陰而陰根陽也應同天獄一併改正

一八風乃取四時對衝三合之辰以木火二干配之蓋對衝為虛虛則生風木火所以生風也春衝酉用丁丑丁巳日夏衝子用甲申甲辰日秋衝卯用丁亥丁未日冬衝午用甲寅甲戌日今通書丁巳謠己酉丁亥謠辛未應改正

一地囊乃四時三合卦之納甲蓋三合無土局而土旺於四季木火金水之所以生旺墓者無適非

土故用當時三合卦內外兩初爻之納甲為地囊  
日其一卦兩用者則再用世應二爻之納甲日春  
木亥卯未局為震坤乾卦正月用震內卦初爻庚  
子外卦初爻庚午二月用坤內卦初爻乙未外卦  
初爻癸丑三月用乾內卦初爻甲子外卦初爻壬  
午夏火寅午戌局為離乾艮卦四月用離內卦初  
爻巳卯外卦初爻巳酉五月用乾世爻壬戌應爻  
甲辰六月用艮內卦初爻丙辰外卦初爻丙戌秋

金巳酉丑局為兌艮巽卦七月用兌內卦初爻丁巳外卦初爻丁亥八月用艮世爻丙寅應爻丙申九月用巽內卦初爻辛丑外卦初爻辛未冬水申子辰局為坎巽坤卦十月用坎內卦初爻戊寅外卦初爻戊申十一月用巽世爻辛卯應爻辛酉十二月用坤世爻癸酉應爻乙卯今通書二月乙未三月壬午謫甲寅四月己酉謫己丑五月謫戊午戊辰六月謫癸未癸巳七八月互易丁亥

謠丁卯九月謠戊辰戊子十月謠庚戌庚子十一  
十二月闕今俱應改正

一通書安葬用庚寅壬寅丙午庚午壬午甲申丙  
申庚申壬申乙酉丁酉己酉辛酉癸酉十四日為  
鳴吠日啓攢用丙子庚子壬子甲寅丙寅乙卯丁  
卯辛卯癸卯甲午十日為鳴吠對日相傳始自郭  
璞取金雞鳴玉犬吠之義而其用日則不知所由  
來明原曲為之解而不能通原始考原疑其有誤



今按神煞起例以雞為酉犬為戌酉為日入之門  
戌為閉物之會煞葬歸於土避土日不用故不用  
戌而用酉星命之術卯為命宮取東方出地之義  
葬埋之術酉為命宮取西方入地之義自酉上溯  
至午而一陰生故鳴吠用午申酉日鳴吠對則子  
寅卯日也其法以甲丙庚壬四干配午申得八日  
避戌土不用以乙丁己辛癸五干配酉得五日避  
未土不用共十三日為鳴吠日己為陰土生於酉

故配酉而不避也又以丙庚壬三干配子得三日  
避戊土不用甲配子為純陽亦避不用以甲丙庚  
壬四干配寅得四日避戊不用以乙丁辛癸四干  
配卯得四日避己不用共十一日為鳴吠對日通  
共二十四日干支皆與通書合而自各有義例通  
書特悞以庚寅壬寅為鳴吠甲午為鳴吠對故遂  
不可解耳應依起例改正

一臨日陽月取三合前辰陰月取三合後辰其義

應吉歷事明原樞要經以為居上臨下容保無疆  
之義皆有吉無凶而通書萬年書誤以為凶日忌  
臨官視事上表陳訟於理乖謬應改為吉日宜臨  
政親民上冊進表章陳詞訟

一天德月德乃上吉之日諸事皆宜今註時憲書  
天德日止宜修造動土月德日止宜修造動土宴  
樂上官諸如此類凡吉神所宜凶神所忌皆多與  
義例不合應逐條斟酌改正

一刑衝破害在日為最不宜之日在方亦為最不宜之方而通書年表皆不載即時憲書年神方位通書亦或載或不載而刀砧火血謬妄之說俱未芟除殊為矛盾亦應增刪改正乾隆五年六月十五日交與奏事郎中張文彬等轉奏本日奉

旨大學士九卿定議具奏其翰詹科道內如有通曉算書者亦著入議欽此

大學士伯臣鄂爾泰等謹

題為遵

旨議奏事該臣等會議得總理增修時憲算書館事務  
和碩莊親王等奏稱奉

旨重修選擇通書萬年書經禮部議覆應改條目交與  
該館詳核訂正務歸畫一可垂永久奉

旨依議欽此欽遵臣等悉心考訂務求其理而得其合  
正其舛悞加之解說因見其荒誕錯悞尚有出於  
臣進愛所奏之外而必不可不改者茲當奉

旨重修之時臣等又經查出自應一併釐定昔年時憲書內九宮錯悞蒙

聖祖仁皇帝特諭欽天監具題改正有例可循但事重司天議須衆允且於時憲書內多所更定大典攸關臣等謹將一切應刪應改之處與欽天監官員公同商酌另單開列恭呈

御覽伏乞

皇上睿鑒勅下大學士九卿定議施行等因具奏前來

臣等伏思選擇吉日三代以上祇論干支之剛柔  
絕少拘忌後世論說日多術家遞行增設神煞本  
一日而吉凶頓殊本一星而名號雜出以致民間  
趨避無所適從現在算書館奉

旨重修選擇通書萬年書先據監臣進愛將應改條目  
及神煞俗論應行刪去之處奏請

勅部定議經禮部議交該館詳核訂正奉

旨依議欽此欽遵在案今和碩莊親王等奏稱悉心攷

訂尚有出於臣進愛所奏之外而必不可不改者  
自應一併釐定且於時憲書內多所更定大典攸  
關請

勅廷議等語臣等查和碩莊親王等開列應刪應改之  
處共二十八條其載在時憲書者共七條一曰五  
姓修宅一曰嫁娶周堂一曰太白遊方一曰長星  
短星一曰洗頭日一曰參觜易位一曰交節日出  
入晝夜時刻臣等公同酌議五姓修宅見於黃帝



宅經以姓音分五行修造各有宜忌歷代以來諸  
儒駁論甚詳然後世雖姓氏繁多猶往往上溯得  
姓之始拘忌姓音以為趨避嫁娶周堂太白遊方  
為婚嫁擇吉之用長星短星宜於裁衣交易等項  
洗頭日宜於申酉亥子等日原無甚義理而載在  
時憲書民俗便安遵行已久應將莊親王等奏請  
刪去之處無庸議至於參甯先後之序由於距星  
之不同從前用參中星為距星則甯在先參在後

康熙年間用新法算書以參西第一星為距星遂  
改為參先觜後今莊親王等奏稱宿之距星惟人  
所指與算法疎密全無關礙等語夫既與算法全  
無關礙則既經康熙年間改定今亦不必更改應  
將所奏參觜仍改觜參之處無庸議至本條內請  
將羅睺計都依古改正之處查羅睺計都生於日  
月交行謂之天首天尾中法以天首屬羅天尾屬  
計自古而然今以西法起算由彼土占候後天行

一日遂以羅為尾計為首查羅計止入七政書內  
應如所奏依古改正再七政古有四餘今以紫氣  
無憑起算遂去其一然古法具在應請添入以備  
四餘之用至奏添時憲書內交節日出入晝夜時  
刻雖屬比舊精密但時憲書款式頒行已久亦不  
便增添應將所奏添入之處無庸議仍令刻入通  
書內可也其不載入時憲書而為選擇通書欽天  
監所據以選擇者二十一條皆民間修方造葬趨

吉避凶之用原係術士推行各家不同謬妄者固  
多譌舛者亦復不少其係于修方者二條曰九良  
星曰飛天獨火係于造葬者六條曰密日曰玉皇  
鑿駕等星曰逆血刃等煞曰穿山大羅喉曰馬前  
六害曰頭白空亡等煞或係術士捏造或係緯書  
所測名目繁多莊親王等既稱實不用以選擇且  
查明牴牾重複應刪之處應如所奏刪去若七聖  
日之不經神在日章光日之無謂此三條亦應如

所奏刪去至於九醜日天願日守牢日天獄天火  
日八風日地囊日鳴吠日臨日共八條既經該館  
查明錯謫應如所奏照善本改正又天德月德等  
吉神所宜通書未經該載刑衝破害等凶神所忌  
亦未經該載及諸謬妄之說未盡芟除此二條係  
該館應辦之事應如所奏令莊親王等率同該館  
各員細心詳考編輯成書一併進呈

御覽恭候

欽定再通書所有神煞名目雖經刪改應仍將舊有名目附載卷末以示傳疑以備博攷俟

命下之日令欽天監照例辦理可也等因於乾隆五年七月二十五日題本月二十七日奉

旨依議欽此

總理增修時憲算書館事務和碩莊親王臣允祿等謹  
奏臣等恭纂萬年書通書今已告竣謹將纂就萬年  
書稿本一套通書稿本五套恭呈

御覽伏候

欽定俟

命下之日欽遵原奉

諭旨辦理再通書向循俗稱理合恭請

欽定嘉名以光典策另擬書名一單仰懇

欽點為此謹

奏等因於乾隆五年八月初七日交與奏事郎中張

文彬等轉奏本日奉

古知道了書名著用協紀辨方書字樣欽此



乾隆六年十二月十八日奉

旨開載諸臣職名

總理

和碩莊親王臣允祿

武英殿監理

和碩親王臣弘晝

總裁

經筵講官刑部左侍郎臣張照

鴻臚寺卿紀錄一次臣梅穀成

原任工部右侍郎臣何國宗

協理館事欽天監監正兼佐領紀錄二次臣進愛

纂修

協同辦理館事員外郎銜仍留欽天監右監副任臣李廷耀

刑部主事留欽天監時憲科中官正任加三級臣何國宸

工部主事留欽天監時憲科秋官正任加一級臣方穀

欽天監時憲科春官正加三級臣何君惠

欽天監漏刻科五官挈壺正加二級臣熊佑

欽天監漏刻科五官挈壺正紀錄二次臣劉毓圻

欽天監時憲科博士加四級臣潘汝瑛

欽天監漏刻科博士臣齊克昌

國子監算學教習原任福建汀州府知府臣何國棟

提調

欽天監天文科五官靈臺郎紀錄三次臣薩哈圖

欽天監主簿加一級紀錄一次臣毛嘉梓

收掌

欽天監時憲科博士加一級臣祝喬齡

欽天監博士臣張弘漢

欽天監時憲科博士紀錄一次臣永定

欽天監時憲科天文生加一級臣李鏊

欽天監時憲科天文生加一級臣白士傑

校錄繪圖推算

欽天監天文科五官靈臺郎加三級臣陳世銓

欽天監時憲科博士加一級臣羅廷

欽天監時憲科博士加一級臣孫君德

欽天監時憲科博士紀錄一次臣鮑懷仁

欽天監時憲科博士臣王德明

欽天監天文科天文生加一級臣何國勳

欽天監天文科天文生加一級臣徐彭年

欽天監時憲科天文生加一級臣何國政

欽天監時憲科天文生臣潘從源

欽 天 監 時 憲 科 天 文 生 臣 何廷祿

欽 天 監 時 憲 科 天 文 生 加 一 級 臣 徐文學

欽 天 監 時 憲 科 天 文 生 加 一 級 臣 董又新

欽 天 監 時 憲 科 天 文 生 臣 程 鐸

欽 天 監 時 憲 科 天 文 生 臣 劉必顯

欽 天 監 時 憲 科 天 文 生 臣 門 泰

欽 天 監 天 文 科 天 文 生 臣 歐天瑞

欽 天 監 時 憲 科 天 文 生 臣 路 銓

武英殿監造

內務府南苑郎中兼佐領加五級紀錄十次臣雅爾岱

內務府錢糧衙門郎中兼佐領加六級紀錄十次臣永保

內務府廣儲司郎中加一級紀錄二次臣衆神保

內務府錢糧衙門主事臣永忠

內務府廣儲司司庫加二級臣胡三格

監造加一級臣李保

監造臣鄭桑格

庫

掌臣  
李延偉

庫

掌  
胡什泰



欽定四庫全書

子部七

欽定協紀辨方書目錄

術數類六

陰陽五行之  
屬

卷一

本原一

卷二

本原二

卷三

義例一

卷四

義例二

卷五

義例三

卷六

義例四

卷七

義例五

卷八

義例六

卷九

立成

卷十

宜忌

卷十一

用事

卷十二

公規一

卷十三

公規二

卷十四

年表一

卷十五

年表二

卷十六

年表三

卷十七

年表四

卷十八

年表五

卷十九

年表六

卷二十

月表一

卷二十一

月表二

卷二十二

月表三

卷二十三

月表四

卷二十四

月表五

卷二十五

月表六

卷二十六

月表七

卷二十七

月表八

卷二十八

月表九

卷二十九

月表十

卷三十

月表十一

卷三十一

月表十二



卷三十二

日表

卷三十三

利用一

卷三十四

利用二

卷三十五

附錄

卷三十六

辨訛

臣等謹案

欽定協紀辨方書三十六卷乾隆四年

皇上特允監臣進愛之請

命和碩莊親王等修訂越三年成編凡本原二卷

義例六卷立成宜忌用事各一卷公規二卷

年表六卷月表十二卷日表一卷利用二卷

附錄辨訛各一卷盡破世俗術家選擇附會  
不經拘忌鮮當之說而正之以干支生尅衰  
旺之理蓋欽天監舊有選擇通書立說猥繁  
動多矛盾我

聖祖仁皇帝嘗纂星厯考原一書以正之而於通書  
監本未之改正是書之成若通書所載子月  
巳月天德之誤五月十二月月恩之誤甲日  
丑時為喜神之誤正月庚日七月甲日為復

日之誤九空大敗等日之誤並條列改駁而  
荒誕無稽如男女合婚嫁娶大小利用及諸  
依托許真君玉匣記之說者悉皆刪削使覽  
者咸得曉然於趨吉避凶之道而不為習俗  
謬悠之論所惑洵利用前民之要術矣伏讀  
御製序文特標敬天之紀敬地之方二義而以吉  
凶禍福決於敬不敬之間尤足以仰見

聖人牖民覺世因習俗而啓導之者無微不至云

乾隆四十五年十月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

子部  
欽定協紀辨方書卷一

詳校官中書臣張經田

靈臺郎臣倪廷梅覆勘

總校官知縣臣楊懋珩

校對官主事臣曾廷澧

謄錄監生臣王滄

欽定四庫全書

欽定協紀辨方書卷一

本原一

朱子曰本圖書原卦畫陰陽家者流其亦衷諸此也作

本原

河圖

洛書

先天八卦次序



先天八卦方位

後天八卦次序

後天八卦方位

先天卦配河圖之象

後天卦配河圖之象

先天卦配洛書之數

後天卦配洛書之數

甲歷

十干 十二支 十二律 二十八舍

四序

六辰

十二月辟卦

十二辰二十八宿星象

二十八宿配日

五行

五行用事



五行生旺

干支五行

三合

六合

五鼠遁

五虎遁

五合化氣

納音

納甲

欽定四庫全書




欽定協紀辨方書

三

卷一


|  |  |  |  |  |  |  |  |  |
|--|--|--|--|--|--|--|--|--|
|  |  |  |  |  |  |  |  |  |
|--|--|--|--|--|--|--|--|--|

河圖



河圖一六為水居北二七為火居南三八為木居東四九為金居西五十為土居中北方水生東方木東方木生南方火南方火生中央土中央土生西方金西方金生北方水此五行相生之序也

洛書





洛書戴九履一左三右七二四為肩六八為足五居中  
央一六水尅二七火二七火尅四九金四九金尅三八  
木三八木尅五中土五中土尅一六水此五行相尅之  
序也


先天八卦次序

八七六五四三二一

|   |   |   |   |   |   |   |   |
|---|---|---|---|---|---|---|---|
| 坤 | 艮 | 坎 | 巽 | 震 | 離 | 兌 | 乾 |
| 陰 | 太 | 陽 | 少 | 陰 | 少 | 陽 | 太 |
| 陰 |   |   |   | 陽 |   |   |   |

繫辭傳曰易有太極是生兩儀兩儀生四象四象生八卦邵子曰乾一兌二離三震四巽五坎六艮七坤八乾兌離震為陽巽坎艮坤為陰乾兌為太陽離震為少陰巽坎為少陽艮坤為太陰

先天八卦方位



說卦傳曰天地定位山澤通氣雷風相薄水火不相射  
八卦相錯邵子曰乾南坤北離東坎西兌居東南震居  
東北巽居西南艮居西北所謂先天之學也

後天八卦次序

乾父



震長男



坎中男



艮少男



坤母



巽長女



離中女




兌少女



說卦傳曰乾天也故稱乎父坤地也故稱乎母震一索而得男故謂之長男巽一索而得女故謂之長女坎再索而得男故謂之中男離再索而得女故謂之中女艮三索而得男故謂之少男兌三索而得女故謂之少女

後天八卦方位




後天八卦方位

欽定協紀辨方書




說卦傳曰帝出乎震齊乎巽相見乎離致役乎坤說言  
乎兌戰乎乾勞乎坎成言乎艮邵子曰乾統三男於東  
北坤統三女於西南乾坎艮震為陽巽離坤兌為陰

先天卦配河圖之象




啓蒙附論曰圖之左方陽內陰外即先天之震離兌乾  
陽長而陰消也其右方陰內陽外即先天之巽坎艮坤  
陰長而陽消也蓋所以象二氣之交運也

後天卦配河圖之象



啓蒙附論曰圖之一六為水即後天之坎位也三八為木即後天震巽之位也二七為火即後天之離位也四九為金即後天兌乾之位也五十為土即後天之坤艮周流四季而偏旺於丑未之交也蓋所以象五氣之順布也


先天卦配洛書之數



啓蒙附論曰洛書九數虛中五以配八卦陽上陰下故九為乾一為坤因自九而逆數之震八坎七艮六乾生三陽也又自一而順數之巽二離三兌四坤生三陰也以八數與八卦相配而先天之位合矣

按術家以乾配九坤配一離配三坎配七其數奇故為陽兌配四震配八巽配二艮配六其數偶故為陰

後天卦配洛書之數





啓蒙附論曰火上水下故九為離一為坎火生燥土故  
八次九而為艮燥土生金故七六次八而為兌乾水生  
濕土故二次一而為坤濕土生木故三四次二而為震  
巽以八數與八卦相配而後天之位合矣

按邵子以文王八卦為入用之位後天之學朱子以洛  
書為數之用術家飛宮弔替俱用後天配洛書其法以  
坎一坤二震三巽四中五乾六兌七艮八離九為序劉  
歆曰八卦九章相為表裏張衡曰聖人重之以卜筮雜

之以九宮則所從來遠矣

甲歷

周禮十日之號十有二辰之號十有二月之號十有二  
歲之號二十有八星之號鄭玄注曰日謂從甲至癸辰  
謂從子至亥月謂從娵至荼歲謂從攝提格至赤奮若  
星謂從角至軫○爾雅月陽月在甲曰畢在乙曰橘在  
丙曰修在丁曰圉在戊曰厲在己曰則在庚曰室在辛  
曰塞在壬曰終在癸曰極月名正月為娵二月為如三

月為病四月為余五月為臯六月為且七月為相八月  
為壯九月為元十月為陽十一月為辜十二月為涂歲  
陽太歲在甲曰闕逢在乙曰旃蒙在丙曰柔兆在丁曰  
強圉在戊曰著雍在己曰屠維在庚曰上章在辛曰重  
光在壬曰玄默在癸曰昭陽歲名太歲在寅曰攝提格  
在卯曰單闕在辰曰執徐在巳曰大荒落在午曰敦牂  
在未曰協洽在申曰涒灘在酉曰作噩在戌曰閭茂在  
亥曰大淵獻在子曰困敦在丑曰赤奮若

十干 十二支 十二律 二十八舍

蔡邕獨斷云干幹也其名有十甲乙丙丁戊己庚辛壬  
癸是也支枝也其名一十有二子丑寅卯辰巳午未申  
酉戌亥是也○禮記月令春月其日甲乙夏月其日丙  
丁中央土其日戊己秋月其日庚辛冬月其日壬癸○  
史記律書曰七正二十八舍律歷天所以通五行八正  
之氣天所以成熟萬物也舍者日月所舍舍者舒氣也  
不周風居西北主殺生東壁居不周風東主辟生氣而

東之至於營室營室者主營胎陽氣而產之東至於危  
危嵬也言陽氣之危嵬故曰危十月也律中應鐘應鐘  
者陽氣之應不用事也其於十二子為亥亥者該也言  
陽氣藏於下故該也廣莫風居北方廣莫者言陽氣在  
下陰莫陽廣大也故曰廣莫東至於虛虛者能實能虛  
言陽氣冬則宛藏於虛日冬至則一陰下藏一陽上舒  
故曰虛東至於須女言萬物變動其所陰陽氣未相離  
尚相如胥也故曰須女十一月也律中黃鐘黃鐘者陽

氣踵黃泉而出也其於十二子為子子者滋也滋者言萬物滋於下也其於十母為壬癸壬之為言任也言陽氣任養萬物於下也癸之為言揆也言萬物可揆度故曰癸東至牽牛牽牛者言陽氣牽引萬物出之也牛者冒也言地雖凍能冒而生也牛者耕植種萬物也東至於建星建星者建諸生也十二月律中大呂大呂者其於十二子為丑丑者紐也言陽氣在上未降萬物厄紐未敢出條風居東北主出萬物條之言條治萬物而出

之故曰條風南至於箕箕者言萬物根棋故曰箕正月也律中泰簇泰簇者言萬物簇生也故曰泰簇其於十二子為寅寅言萬物始生蟄然也故曰寅南至於尾言萬物始生如尾也南至於心言萬物始生有華心也南至於房房者言萬物門戶也至於門則出矣明庶風居東方明庶者明衆物盡出也二月也律中夾鐘夾鐘者言陰陽相夾厠也其於十二子為卯卯之為言茂也言萬物茂也其於十母為甲乙甲者言萬物剖符甲而出

也乙者言萬物生軋軋也南至於氐氐者言萬物皆至也南至於亢亢者言萬物亢見也南至於角角者言萬物皆有枝格如角也三月也律中姑洗姑洗者言萬物洗生其於十二子為辰辰者言萬物之娠也清明風居東南維主風吹萬物而西之軫軫者言萬物益大而軫軫然西至於翼翼者言萬物皆有羽翼也四月也律中仲呂仲呂者言萬物盡旅而西行也其於十二子為巳巳者言陽氣之已盡也西至於七星七星者陽數成於



七故曰七星西至於張張者言萬物皆張也西至於注  
注者言萬物之始衰陽氣下注故曰注五月也律中蕤  
賓蕤賓者言陰氣幼少故曰蕤痿陽不用事故曰賓景  
風居南方景者言陽氣道竟故曰景風其於十二子為  
午午者陰陽交故曰午其於十母為丙丁丙者言陽道  
著明故曰丙丁者言萬物之丁壯也故曰丁西至于弧  
弧者言萬物之吳落且就死也西至于狼狼者言萬物  
可度量斷萬物故曰狼涼風居西南維主地地者沈奪

萬物氣也六月也律中林鐘林鐘者言萬物就死氣林  
林然其於十二子為未未者言萬物皆成有滋味也北  
至於罰罰者言萬物氣奪可伐也北至於參參言萬物  
可參也故曰參七月也律中夷則夷則言陰氣之賊萬  
物也其於十二子為申申者言陰用事申賊萬物故曰  
申北至於濁濁者觸也言萬物皆觸死也故曰濁北至  
於留留者言陽氣之稽留也故曰留八月也律中南呂  
南呂者言陽氣之旅入藏也其於十二子為酉酉者萬

物之老也故曰酉閭闔風居西方閭者倡也闔者藏也  
言陽氣道萬物闔黃泉也其於十母為庚辛庚者言陰  
氣庚萬物故曰庚辛者言萬物之辛生故曰辛北至於  
胃胃者言陽氣就藏皆胃胃也北至於婁婁者呼萬物  
且內之也北至於奎奎者主毒螫殺萬物也奎而藏之  
九月也律中無射無射者陰氣盛用事陽氣無餘也故  
曰無射其於十二子為戌戌者言萬物盡滅故曰戌

四序

寅卯辰木 巳午未火 申酉戌金 亥子丑水  
右謂之令星即春夏秋冬五氣也

六辰


子寅辰午申戌為陽 丑卯巳未酉亥為陰

右陽從陽陰從陰六陽辰四陽卦納之六陰辰四陰  
卦納之



|  |  |  |  |  |  |  |  |  |
|--|--|--|--|--|--|--|--|--|
|  |  |  |  |  |  |  |  |  |
|--|--|--|--|--|--|--|--|--|

十二月辟卦



正月建寅泰卦

月令孟春鄭注曰孟春者日月會於娵訾而斗建寅之辰也正月三陽之月泰三陽之卦故以配之

二月建卯大壯卦

月令仲春鄭注曰仲春者日月會於降婁而斗建卯之辰也二月四陽之月大壯四陽之卦故以配之

三月建辰夬卦

月令季春鄭注曰季春者日月會於大梁而斗建辰

之辰也三月五陽之月夬五陽之卦故以配之

四月建巳乾卦

月令孟夏鄭注曰孟夏者日月會於實沈而斗建巳之辰也四月純陽之月乾純陽之卦故以配之

五月建午姤卦

月令仲夏鄭注曰仲夏者日月會於鶉首而斗建午之辰也夏至一陰始生姤一陰之卦故以配之

六月建未遯卦



月令季夏鄭注曰季夏者日月會於鶉火而斗建未之辰也六月二陰之月遯二陰之卦故以配之

七月建申否卦

月令孟秋鄭注曰孟秋者日月會於鶉尾而斗建申之辰也七月三陰之月否三陰之卦故以配之

八月建酉觀卦

月令仲秋鄭注曰仲秋者日月會於壽星而斗建酉之辰也八月四陰之月觀四陰之卦故以配之

九月建戌剝卦

月令季秋鄭注曰季秋者日月會於大火而斗建戌之辰也九月五陰之月剝五陰之卦故以配之

十月建亥坤卦

月令孟冬鄭注曰孟冬者日月會於析木而斗建亥之辰也十月純陰之月坤純陰之卦故以配之

十一月建子復卦

月令仲冬鄭注曰仲冬者日月會於星紀而斗建子

金匱要略卷之三十一  
卷一  
之辰也冬至一陽始生復一陽之卦故以配之

十二月建丑臨卦


月令季冬鄭注曰季冬者日月會於玄枵而斗建丑之辰也十二月二陽之月臨二陽之卦故以配之

考原曰按史記天官書曰用昏建者杓夜半建者衡平旦建者魁又春秋運斗極云第一天樞第二天璇第三天權第五衡第六開陽第七搖光第一至第四為魁第五至第七為杓合而為斗如正月初昏則用斗杓指

寅夜半則用斗衡指寅平旦則用斗魁指寅也其日月  
所會之宮謂之月將姬訾亥也降婁戌也大梁酉也實  
沈申也鶉首未也鶉火午也鶉尾巳也壽星辰也大火  
卯也析木寅也星紀丑也玄枵子也子曰神后丑曰大  
吉寅曰功曹卯曰太衝辰曰天罡巳曰太乙午曰勝光  
未曰小吉申曰傳送酉曰從魁戌曰河魁亥曰登明月  
建運天道而左旋為天關月將稟地道而右轉為地軸



# 十二辰二十八宿星象



蠡海集曰十二肖屬子為陰極幽潛隱晦以鼠配之鼠  
藏迹午為陽極顯易剛健以馬配之馬快行丑為陰俯  
而慈愛以牛配之牛舐犢未為陽仰而秉禮以羊配之  
羊跪乳寅為三陽陽勝則暴以虎配之虎性暴申為三  
陰陰勝則黠以猴配之猴性黠卯酉為日月之門二肖  
皆一竅兔舐雄毛則孕感而不交也雞合踏而無形交  
而不感也辰巳陽起而變化龍為盛蛇次之故龍蛇配  
辰巳龍蛇者變化之物也戌亥陰斂而持守狗為盛猪

次之故狗猪配戌亥狗猪者鎮靜之物也或云皆取不全之物配肖屬者非也庶物萬類豈特十二哉况無義理不足信也明矣

考原曰十二辰禽象子鼠丑牛寅虎卯兔辰龍巳蛇午馬未羊申猴酉雞戌狗亥猪其說相沿已久莫知其所自來雖於經典無見然以傳記子史考之則不獨宋以後也如韓愈毛穎傳謂食於卯地祭張員外文謂虎取而去來寅其徵則唐時有之矣管輅傳推東方朔龍蛇



之占以為變化相推會於辰巳又譙周謂司馬為典午則漢晉時有之矣邈而上之陳敬仲筮者言當昌於姜姓之國而釋春秋謂觀之六四納得辛未辛為巽長女未為羊羊加女為姜則是周時又已有之也至於二十八宿禽象則近代方有之意者因十二辰所取而附會其說耳何則十二辰以子午卯酉為四中宮故一宮各筮三象子宮女虛危虛星居中故為鼠之本象女為蝠危為燕則取其似鼠者以配之也卯宮氏房心房星居

中故為兔之本象氏為貉心為狐則取其似兔者以配之也午宮柳星張星居中故為馬之本象柳為獐張為鹿則取其似馬者以配之也酉宮胃昴畢昴星居中故為雞之本象胃為雉畢為鳥則取其似雞者以配之也其餘寅申巳亥辰戌丑未八宮則各筦兩象而以近中宮者為主辰宮亢近中宮故為龍之本象角居其旁則取蛟為龍之類以配之寅宮尾近中宮故為虎之本象箕居其旁則取豹為虎之類以配之丑宮牛近中宮故

為牛之本象斗居其旁則取獬為牛之類以配之亥宮  
室近中宮故為猪之本象壁居其旁則取獮為猪之類  
以配之戌宮婁近中宮故為狗之本象奎居其旁則取  
狼為狗之類以配之中宮甫近中宮故為猴之本象參  
居其旁則取猿為猴之類以配之未宮鬼近中宮故為  
羊之本象井居其旁則取犴為羊之類以配之巳宮翼  
近中宮故為蛇之本象軫居其旁則取蚓為蛇之類以  
配之也

二十八宿配日

考原云日有六十宿有二十八四百二十日而一週四百二十者以六十與二十八俱可以度盡也故有七元之說一元甲子日起虛以子象鼠而虛為日鼠也二元甲子起奎三元甲子起畢四元甲子起鬼五元甲子起翼六元甲子起氐七元甲子起箕至七元盡而甲子又起虛周而復始但一元起於何年月日則不可得而考矣今按日月五星運行二十八舍遲速不齊躔次各別

交錯參差遲留伏逆縱使推之歷始必有甲子年月日時日在虛月在危五星以次居室壁奎婁胃者然少選月即過其度矣且安得又從昴至鬼復順次而列之哉以不齊之天行按一定之星舍乃萬無之理也七政安得與二十八宿相配耶徧閱羣書莫可考究及見西域吉凶時日善惡宿曜經乃得其說蓋彼國不知十干十二支之名而用二十八宿以紀日其七政加二十八宿猶干之加於支非謂七政之果躔于此宿也又其術以

人之生日所逢何曜何宿為本命謂之命宿而以加於  
行事所逢曜宿參伍攷之以命凶吉又以宿曜性情合  
所為之事之剛柔健順以定從違亦有似於中國之建  
除星命家言者其宿曜之名虛昴星房屬日危畢張心  
屬月室觜翼尾屬火壁參軫箕屬水奎井角斗屬木婁  
鬼亢牛屬金胃柳氏女屬土則各從其國語假如日曜  
太陽在回鶻則曰蜜在波斯則曰曜森勿在天竺則曰  
阿你底耶重譯之即中國之日也其他皆倣此七元周

而復始恰與此相符其書又謂中國西天諸國此法並  
所通行今按歷家每歲鋪注于六十甲子載在時憲書  
而無所用神煞中惟伏斷暗金二者從此起例其他並  
不關涉然外域既以此紀年則歷家存此可使絕域殊  
方同曉某日是何甲子甚為有益良不可廢也

五行

六經論五行者始見於尚書洪範曰一五行一曰水二  
曰火三曰木四曰金五曰土大禹謨曰水火金木土穀

惟修其源起於河圖洛書之數蓋圖書之一六水也二  
七火也三八木也四九金也五十土也在圖則左旋而  
相生在書則右轉而相克也然土於圖書為五十中宮  
之數無定位無專體者也惟呂氏春秋則以土直季夏  
之月以順相生之序白虎通又以土直辰戌丑未之四  
季而分旺於四時文王後天圖象坤艮二土獨居夏秋  
冬春之交則以火必得土而後能成金水必得土而後  
能生木也今按行也者言其行於地者也質行於地而




氣通於天數之有五焉故曰五行也地者土也以其對  
天言之則曰地以其質言之固土也土之為四行君也  
固也君則不專其司不居其部是故以火之克金而秋  
乃承夏令也則謂既有四方必有中央而中央固土也  
可以嗣火之老而生金也以春夏秋冬夏之遞壇四行轉  
多而土轉少也則謂季月必辰戌丑未而辰戌丑未固  
土也減十二日以與本令餘十八日為土王用事則各  
七十二日也坤艮二土居四氣之交為土之真體則後

天圖象明之乾巽二方據魁罡之戶示土之神用則素  
問運氣詳之土之君乎四行也審矣然此猶皆為有象  
可示者也若其無象可示者則寅申巳亥子午卯酉實  
無一之離乎土焉何也非土則水火金木不能以行其  
能以行者皆土也




五行用事



神樞經曰五行旺各有時惟土居無所定乃於四立之前各旺一十八日○歷例曰立春木立夏火立秋金立冬水各旺七十二日土於四立之前各旺一十八日合之亦為七十二日總三百有六十而歲成矣

# 五行生旺



考原曰木長生於亥火長生於寅金長生於巳水長生於申土亦長生於申寄生於寅各由長生沐浴冠帶臨官帝旺衰病死墓絕胎養順歷十二辰蓋天道循環生生不已故木方旺而火已生火方旺而金已生金方旺而水已生水方旺而木已生由長生而順推稱則必壯盛則必衰終而復始迭運不窮此四時之所以錯行五氣之所以順布也至於土生於申而寄生於寅則後天坤艮之位故易於坤曰萬物皆致養焉於艮曰萬物之

所成終而所成始也

按五行長生之義考原之說甚明而土之生於寅申則引而未發由今考之水土之同生於申也申為坤坤為地水土所以凝也土之寄生於寅也寅為孟春孟春之月天氣下降地氣上騰天地所以和同草木所以萌動也是故洪範家獨以土生於申為五行之體陰陽選擇諸家皆以土生於寅為五行之用蓋長生在寅則臨官在巳乃為土旺金生與木火水同為一例然則以土為





生於寅者所以順五行相生之序固與月令土旺於夏  
秋之交以順四時相生之序者同出於理之自然而非  
為臆說也外此又有陽死陰生陽順陰逆之說甲木死  
於午則乙木生焉丙戌死於酉則丁巳生焉庚金死於  
子則辛金生焉壬水死於卯則癸水生焉由長生而沐  
浴十二位皆逆轉陽死則陰生陰死則陽生此二氣之  
分也陽臨官則陰帝旺陰臨官則陽帝旺此四時之會  
也順逆分合俱極妙理論十干則分陰陽論五行則陽


統陰尤天地自然之義故凡言數者皆祖之此吉凶神  
煞所由起也



干支五行







天干則甲乙屬木丙丁屬火戊己屬土庚辛屬金壬癸屬水地支則寅卯辰屬木配東方也巳午未屬火配南方也申酉戌屬金配西方也亥子丑屬水配北方也而土寄旺於辰戌丑未之間配四季也五星家又以寅亥屬木卯戌屬火辰酉屬金子丑屬土而午則為日未則為月者則以子丑在下故為土午未在上故為日為月寅卯辰巳申酉戌亥分布左右則如四時之流行於天地之間故以其左右之合宮而別為木火金水之序也

右皆考原所載今具錄之其言五星五行則引而未發  
蓋天者日也月也星者日月之餘也午未者離子丑者  
坎離為日坎為月午之為日是巳子之不為月者何月  
者水之精懸乎上而受日之光者非北方子之位也子  
丑之氣衝乎上而與日並其方固必在未也地者水也  
土也子水丑土丑又比水之土其為地之體無可疑也  
地土也故子丑為土也天位乎上地位乎下行乎兩間  
者必木火金水矣子丑為水土土水之際木必生焉所




以亥寅為木一長生一祿位也木成而火已出矣寅火  
長生也卯木旺也旺則必嬾嬾則必歸其根故卯戌為  
火也卯戌為火則戌為斡天之氣戌之所居斡天之氣  
始於辰亦戌也土旺必生金故辰酉為金酉者金之  
帝也酉居金旺之極於其未至於極而水已生於申對  
宮為己巳金之母也水必以申己者申己逼於午未最  
高之地無水也舉母則子歸水不得舍土而自立其麗  
於土者即子丑之位土之所攝命為土而不命為水若

其離土而言水必納於母氣故申巳為水也水為生物之源是以麗乎日月其次則金其次則火其次則木其次則土五緯之序水最近日金次之火又次之木又次之土又次之此麗乎天者之自然之序也水土所生者木上生而為火土又上生而為金又上生而為水如畫卦之由下而上也此行乎地者之自然之序也然則五星五行具有實理而非人所能強為也

|  |  |  |  |  |  |  |  |  |
|--|--|--|--|--|--|--|--|--|
|  |  |  |  |  |  |  |  |  |
|--|--|--|--|--|--|--|--|--|

三合



申子辰合水局亥卯未合木局寅午戌合火局巳酉丑合金局○考原曰三合者取生旺墓三者以合局也水生於申旺於子墓於辰故申子辰合水局也木生於亥旺於卯墓於未故亥卯未合木局也火生於寅旺於午墓於戌故寅午戌合火局也金生於巳旺於酉墓於丑故巳酉丑合金局也

今按淮南子云木生於亥壯於卯死於未三辰皆木也火生於寅壯於午死於戌三辰皆火也土生於午壯於

戌死於寅三辰皆土也金生於巳旺於酉死於丑三辰皆金也水生於申壯於子死於辰三辰皆水也故五勝生一壯五終九五九四十五故神四十五日而一徙以三應五故八徙而歲終由今考之陰陽家言三合者唯水火木金而已不及於土也然言陰陽之書淮南子亦可為古矣所為三合之說未必不始於是書而土之三合則不傳於世者何歟且世所言土之長生等十二位與火無異而淮南子則謂生午壯戌死寅亦他書所無

有也今附載於此以備一義

六合





子與丑合寅與亥合卯與戌合辰與酉合巳與申合午  
與未合○蠡海集曰陰陽家地支六合者日月會於子  
則斗建丑日月會於丑則斗建子故子與丑合日月會  
於寅則斗建亥日月會於亥則斗建寅故寅與亥合日  
月會於卯則斗建戌日月會於戌則斗建卯故卯與戌  
合日月會於辰則斗建酉日月會於酉則斗建辰故辰  
與酉合日月會於巳則斗建申日月會於申則斗建巳  
故巳與申合日月會於午則斗建未日月會於未則斗

建午故午與未合○考原曰六合者以月建與月將為相合也如正月建寅月將在亥故寅與亥合二月建卯月將在戌故卯與戌合也月建左旋月將右轉順逆相值故為六合

按月將即是日月無光受日之光月行與日合而成歲紀則是日者月之將也故曰月將非別有神從日而右轉者也其躔次亥曰姤訾戌曰降婁酉曰大梁申曰實沈未曰鶉首午曰鶉火巳曰鶉尾辰曰壽星卯曰大火


寅曰析木丑曰星紀子曰玄枵春秋左氏傳已有其說  
至今用之其躔度過宮具載公規

五鼠遁




甲巳日起甲子時乙庚日起丙子時丙辛日起戊子時  
丁壬日起庚子時戊癸日起壬子時○考原曰甲子日  
起甲子時從甲子順數至次日子時得丙子故乙日起  
丙子從甲至己越五日共六十時花甲周而復始故己  
日子時亦為甲子也

五虎遁



甲巳年正月起丙寅乙庚年正月起戊寅丙辛年正月起庚寅丁壬年正月起壬寅戊癸年正月起甲寅○考原曰上古歷元年月日時皆起於甲子是甲子年必甲子月為年前冬至十一月也而正月建寅故得丙寅二月丁卯以次順數至次年正月得戊寅故乙年正月起戊寅從甲至巳越五年共六十月花甲周而復始故巳年正月亦為丙寅也

五合化氣





甲與己合乙與庚合丙與辛合丁與壬合戊與癸合甲  
己化土乙庚化金丙辛化水丁壬化木戊癸化火○考  
原曰五合者即五位相得而各有合也河圖一與六二  
與七三與八四與九五與十皆各有合以十干之次言  
之一為甲六為己故甲與己合二為乙七為庚故乙與  
庚合三為丙八為辛故丙與辛合四為丁九為壬故丁  
與壬合五為戊十為癸故戊與癸合又年起月日起時  
越五則花甲周而復始而月時同干亦即五合之義

按化氣之理沈括據黃帝素問論之最明素問有五運六氣所謂五運者甲己為土運乙庚為金運丙辛為水運丁壬為木運戊癸為火運也黃帝問岐伯五運之所始岐伯引太始天元冊文曰始于戊己之分所謂戊己分者奎壁角軫也奎壁角軫天地之門戶也王冰注引遁甲六戊為天門六己為地戶天門在戌亥之間奎壁之分地戶在辰巳之間角軫之分陰陽皆始于辰五運起于角軫者亦始于辰也甲己之歲戊己繫天之氣經

于角軫角屬辰軫屬巳其歲得戊辰巳巳干皆土故為  
土運乙庚之歲庚辛素天之氣經于角軫其歲得庚辰  
辛巳干皆金故為金運丙辛之歲壬癸元天之氣經于  
角軫其歲得壬辰癸巳干皆水故為水運丁壬之歲甲  
乙蒼天之氣經于角軫其歲得甲辰乙巳干皆木故為  
木運戊癸之歲丙丁丹天之氣經于角軫其歲得丙辰  
丁巳干皆火故為火運運臨角軫則氣在奎壁氣與運  
常司天地之門戶戊巳在角軫則甲乙在奎壁甲巳歲

必甲戌乙亥也故素問曰土位之下風氣承之庚辛在  
角軫則丙丁在奎壁乙庚歲必丙戌丁亥也故曰金位  
之下火氣承之壬癸在角軫則戊己在奎壁丙辛歲必  
戊戌己亥也故曰水位之下土氣承之甲乙在角軫則  
庚辛在奎壁丁壬歲必庚戌辛亥也故曰風位之下金  
氣承之丙丁在角軫則壬癸在奎壁戊癸歲必壬戌癸  
亥也故曰相火之下水氣承之五行家以戊寄於己已  
寄於午六壬家以戊寄於己已寄於未惟素問以戊寄

於戌己寄於辰遁甲以六戌為天門六己為地戶與素  
問同水土相隨水金子也陽土故居金行之末以為亥  
始水木母也己金祖也陰土故居水行之墓以為己始  
故曰天地之門戶而萬物所從出星家有逢龍則化之  
說亦本於此此十干化氣之源也

納音

沈括曰六十甲子有納音鮮原其意蓋六十律旋相為  
宮法也一律含五音十二律納六十音也凡氣始於東

方而右行音起於西方而左行陰陽相錯而生變化所

謂氣始於東方者四時始於木右行傳於火火傳於土

土傳於金金傳於水所謂音始於西方者五音始於金

左旋傳于火火傳于木木傳于水水傳於土

納音與易納甲同法

乾納甲而坤納癸始于乾而終于坤納音之法同類娶

妻隔八生子此律呂相生之法也五行先伸而後孟孟

而後季此遁甲三元之紀也甲子金之伸

黃鐘之商

同位娶

乙丑

大呂之商同位謂甲與乙丙與丁之類下皆倣此

隔八下生壬申金之孟

夷則之商隔八謂大呂南呂壬申同位娶癸酉之商隔八上

下生夷則也下皆倣此姑洗之商此金三元終若只以陽辰言之則依遁甲順傳仲益季若兼妻言之

生庚辰金之季則逆傳益庚辰同位娶辛巳仲呂隔八下生戊子火之

仲季也黃鐘之徵金三元終戊子娶己丑大呂生丙申火之

仲黃鐘之徵金三元終孟夷則丙申娶丁酉南呂生甲辰火之季姑洗甲辰娶

乙巳仲呂生壬子木之仲黃鐘之角火三元終如是左

行至於丁巳仲呂之宮五音一終復自甲午金之仲娶

乙未隔八生壬寅一如甲子之法終於癸亥謂蕤賓娶林鐘上生

太簇  
之類  
子至於巳為陽故自黃鐘至於仲呂皆下生自午

至於亥為陰故自林鐘至於應鐘皆上生

蠡海集曰萬物之所為以生者必由氣氣者何金也金受氣順行則為五行之體逆行則為五行之用順行為五行之體者金生水水生木木生火火生土冬至起歷之元自冬而春春而夏夏而長夏長夏而歸於秋返本歸原而收斂也逆行為五行之用者金出鑛而從革於火以成材成材則為有生之用然火非木不生必循木



以繼之木必依水以滋榮水必托土以止畜故木而水  
水而土是則四行之類土以定位故大撓作甲子分配  
五行爲納音蓋金能受聲而宣氣故也法曰甲娶乙妻  
隔八生子子生孫而後行繼代其位初一日金金爲氣  
居先甲子爲受氣之始甲娶乙妻隔八壬申是爲子矣  
壬娶癸妻隔八庚辰是爲孫矣庚娶辛妻隔八戊子火  
代其位次二曰火戊繼其後戊娶己妻隔八丙申是爲  
子矣丙娶丁妻隔八甲辰是爲孫矣甲娶乙妻隔八壬

子木代其位次三曰木壬繼其後壬娶癸妻隔八庚申  
是為子矣庚娶辛妻隔八戊辰是為孫矣戊娶己妻隔  
八丙子水代其位次四曰水丙繼其後丙娶丁妻隔八  
甲申是為子矣甲娶乙妻隔八壬辰是為孫矣壬娶癸  
妻隔八庚子土代其位次五曰土庚娶辛妻隔八戊申  
是為子矣戊娶己妻隔八丙辰是為孫矣丙娶丁妻隔  
八甲子金復代其位甲午乙未起如前法是故有五子  
歸庚之說道家者流取其義用配五方之位自子干頭

數至庚字則為其數甲子金自甲數至七逢庚則西方  
金得七氣戊子火自戊數至三逢庚則南方火得三氣  
壬子木自壬數至九逢庚則東方木得九氣丙子水自  
丙數至五逢庚則北方水得五氣庚子土則自得一為  
中方一氣是為五子歸庚也乃知金者受氣之先順行  
則為五行之體逆行則為五行之用故六十甲子納音  
者以充萬物之用


考原曰五行以氣始形終為次則洪範之水火木金土

是也。以播於四時，相生為次，則月令之木、火、土、金、水是也。以飭庀五材，尅為次，則禹謨之水、火、金、木、土是也。納音五行，始金、次火、次木、次水、次土，既非本其始終，又無取於生尅。故說者莫知其所自來，詳考其義，蓋亦祖述易象之意，即先後天卦之理也。各為圖以明之。

欽定四庫全書


卷一

納音五行應先天圖



先天之圖乾兌居首屬金次以離屬火又次震巽屬木  
又次以坎屬水終於艮坤屬土故始於金終於土者乾  
始坤成之義也金取於天之剛土取於地之柔火附於  
天水附於地而木以生氣居中此納音所本於先天之  
序也


納音五行應後天圖





後天之圖亦以乾居首而逆轉自乾兌之金旺於西方  
次轉而為離火旺於南方次又轉而為震巽之木旺於  
東方次又轉而為坎水旺於北方而土旺於四季故退  
艮坤以居終焉此納音所本於後天之序也

納音五行分三元應樂律隔八相生圖



右圖以甲子乙丑為金上元壬申癸酉為金中元庚辰  
辛巳為金下元三元俱周則傳於戊子己丑為火上元  
丙申丁酉為火中元甲辰乙巳為火下元自此以後皆  
依前圖金火木水土之次而用樂律同位娶妻隔八生  
子之法以終於丁巳而納音小成矣又自甲午乙未為  
金上元起如前法以終於丁亥而納音大成矣

按十干十二支相錯為六十五音十二律相乘亦為六  
十甲子金而乙丑亦為金者同位娶妻也乙丑金而壬

申又為金者隔八生子也一行各三元而後傳於次行  
猶春有孟仲季三月而後傳於夏也自甲子至丁巳而  
五行之三元一周猶易之三畫為小成也自甲午至丁  
亥而五行之三元又一周猶易之六畫為大成也其立  
法皆與律呂相應

納音干支起數合五行

甲巳子午九乙庚丑未八丙辛寅申七丁壬卯酉六戊  
癸辰戌五己亥屬四數

蠡海集云或問曰先天之數何緣而起余答曰數極於九自九逆退取之故甲己子午九乙庚丑未八丙辛寅申七丁壬卯酉六戊癸辰戌五天干已盡而地支獨遺己亥是以己亥得四終焉况夫亥為天門己為地戶純陽之位為開闔之樞所以關鍵五行也

瑞桂堂暇錄曰六十甲子之納音以金木水火土之音而明之也一六為水二七為火三八為木四九為金五十為土然五行之中惟金木有自然之音水火土必相

假而後成音蓋水假土火假水土假火故金音四九木  
音三八水音五十火音一六土音二七此不易之論也  
何以言之甲己子午九也乙庚丑未八也丙辛寅申七  
也丁壬卯酉六也戊癸辰戌五也己亥四也甲子乙丑  
其數三十有四四者金之音也故曰金戌辰己己其數  
二十有三三者木之音也故曰木庚午辛未其數三十  
有二二者火也土以火為音故曰土甲申乙酉其數三  
十十者土也水以土為音故曰水戊子己丑其數三十

有一一者水也火以水為音故曰火凡六十甲子莫不皆然此納音之所由起也

考原曰此揚子雲太玄論聲律所紀數也凡兩干兩支之合其餘數得四九者為金得一六者為火得三八者為木得五十者為水得二七者為土如甲子皆九得數十八乙丑皆八得數十六合之三十有四故為金壬子申七得數十三癸酉六得數十一合之二十有四故亦為金也其餘按數推之莫不皆然但所配一六二七

等數與河圖之數不同今按大衍之數五十其用四十有九以兩干兩支之合數於四十九內減之餘數滿十去之餘一六為水二七為火三八為木四九為金五十為土各取所生之五行以為納音如是則與河圖相同又揲著之法用餘策以定奇偶此用餘數以定五行其理正相合也如甲九子九乙八丑八其合數三十四於四十九內減之餘十五十不用餘五屬土土生金故曰金丙寅丁卯共合數二十六於四十九內減之餘二十



三十不用餘三屬木木生火故曰火戊辰巳巳共合數  
二十三於四十九內減之餘二十六不用餘六屬水  
水生木故曰木庚午辛未共合數三十二於四十九內  
減之餘十七不用餘七屬火火生土故曰土餘倣此  
按揚雄太玄經曰子午之數九丑未八寅申七卯酉六  
辰戌五巳亥四故律四十二呂三十六并律呂之數或  
還或否凡七十有八黃鐘之數立焉其以為度也皆生  
黃鐘又曰甲巳之數九乙庚八丙辛七丁壬六戊癸五

聲生於日律生於辰聲以情質律以和聲聲律相協而  
八音生歷代以來宗之謂之先天之數顧其甲巳子午  
之何以九乙庚丑未之何以八則罕有確論焉今按子  
午者乾震之所納也丑未者坤巽之所納也寅申者坎  
所納也卯酉者離所納也辰戌者艮所納也已亥者兌  
所納也陽數極於九陰數極於八故乾坤得之震巽長  
而統於父母其餘以次而降兩大六子男女長少之序  
秩然不紊實非人之能強為也若夫十日之序則又各

隨化氣壽夭之數而亦無一毫造作於其間甲己土也  
土終古不毀即析為微塵蕩為鄰虛而其質固在也為  
最壽故數九其次則金雖火鑠之亦有質灰氣散之時  
而堅固為萬物王也乙庚金也故次甲己也又次則水  
日炙風銷而火煎烹之亦有乾盡之時而無自然銷滅  
之期雖其堅固不若金而其柔弱轉能久壽而物莫若  
也丙辛水也故次乙庚也又次則木一歲之中榮落有  
定期也丁壬木也故次丙辛也又次則火一晝夜間顯

晦有定期也戊癸火也故次丁壬也且甲己土生乙庚  
金乙庚金生丙辛水丙辛水生丁壬木丁壬木生戊癸  
火層累而下之又自然而然之數也然則無十無一二  
三何也曰數終於九十即一也若夫一二三乃天地人  
之大數不得偏寄於一日一辰之間者也且言九八七  
六五四則一二三在其中也故黃鐘八十一十二辰止  
得七十八而揚子曰黃鐘之數立焉蓋已虛函三數而  
成八十一也

五行五音

宮

屬土

甲子乙丑  
甲午乙未

壬申癸酉  
壬寅癸卯

庚辰辛巳  
庚戌辛亥

商

屬金

丙子丁丑  
丙午丁未

甲申乙酉  
甲寅乙卯

壬辰癸巳  
壬戌癸亥

角

屬木

戊子己丑  
戊午己未

丙申丁酉  
丙寅丁卯

甲辰乙巳  
甲戌乙亥

徵

屬火

庚子辛丑  
庚午辛未

戊申己酉  
戊寅己卯

丙辰丁巳  
丙戌丁亥

羽

屬水

壬子癸丑  
壬午癸未

庚申辛酉  
庚寅辛卯

戊辰己巳  
戊戌己亥

朱子曰樂聲是土金木火水洪範是水火木金土蓋納

音者以干支分配於五音而本音所生之五行即為其

干支所納之音也初一宮商角徵羽納甲丙戊庚壬係以五子而隨以五丑宮得甲子商得丙子角得戊子徵得庚子羽得壬子宮為土土生金故甲子乙丑納音金商為金金生水故丙子丁丑納音水角為木木生火故戊子己丑納音火徵為火火生土故庚子辛丑納音土羽為水水生木故壬子癸丑納音木次二商角徵羽宮納甲丙戊庚壬係以五寅而隨以五卯商金得甲寅乙卯納音水角木得丙寅丁卯納音火徵火得戊寅己卯

納音土羽水得庚寅辛卯納音木宮土得壬寅癸卯納  
音金次三角徵羽宮商納甲丙戊庚壬係以五辰而隨  
以五巳角木得甲辰乙巳納音火徵火得丙辰丁巳納  
音土羽水得戊辰己巳納音木宮土得庚辰辛巳納音  
金商金得壬辰癸巳納音水以上六甲得其半納音小  
成次四復以宮商角徵羽納甲丙戊庚壬係以五午而  
隨以五未宮土得甲午乙未納音金商金得丙午丁未  
納音水角木得戊午己未納音火徵火得庚午辛未納

音土羽水得壬午癸未納音木次五復以商角徵羽宮  
納甲丙戊庚壬係以五申而隨以五酉商金得甲申乙  
酉納音水角木得丙申丁酉納音火徵火得戊申己酉  
納音土羽水得庚申辛酉納音木宮土得壬申癸酉納  
音金次六復以角徵羽宮商納甲丙戊庚壬係以五戌  
而隨以五亥角木得甲戌乙亥納音火徵火得丙戌丁  
亥納音土羽水得戊戌己亥納音木宮土得庚戌辛亥  
納音金商金得壬戌癸亥納音水於是六甲全而納音



大成矣陽生於子自甲子以至癸巳陰生於午自甲午  
以至癸亥故三十而復從宮起宮君商臣角民皆人道  
也故皆可以為首徵事羽物皆人所用也故不可以為  
首是以三甲終而復始於宮干為天支為地音為人三  
才之五行備矣

陶宗儀曰甲子乙丑海中金者子屬水又為湖又為水  
旺之地兼金死於子墓於丑水旺而金死墓故曰海中  
金也丙寅丁卯鑪中火者寅為三陽卯為四陽火既得

地又得寅卯之木以生之此時天地開鑪萬物始生故  
曰鑪中火也戊辰己巳大林木者辰為原野己為六陽  
木至六陽則枝榮葉茂以茂盛之木而在原野之間故  
曰大林木也庚午辛未路傍土者未中之木而生午位  
之旺火火旺則土焦未能育物猶路傍土若也故曰路  
傍土也壬申癸酉劍鋒金者申酉金之正位兼臨官申  
帝旺酉金既生旺則成剛矣剛則無踰於劍鋒故曰劍  
鋒金也甲戌乙亥山頭火者戌亥為天門火照天門其

光至高故曰山頭火也丙子丁丑澗下水者水旺於子  
衰於丑旺而反衰則不能為江河故曰澗下水也戊寅  
己卯城頭土者天干戊己屬土寅為艮山土積而為山  
故曰城頭土也庚辰辛巳白鑷金者金養於辰生於巳  
形質初成未能堅利故曰白鑷金也壬午癸未楊柳木  
者木死於午墓於未木既死墓雖得天干壬癸之水以  
生之終是柔弱故曰楊柳木也甲申乙酉井泉水者金  
臨官申帝旺酉金既生旺則水由以生然方生之際力

量未洪故曰井泉水也丙戌丁亥屋上土者丙丁屬火  
戌亥為天門火既炎上則土非在下而生故曰屋上土  
也戊子己丑霹靂火者丑屬土子屬水水居正位而納  
音乃火水中之火非神龍則無故曰霹靂火也庚寅辛  
卯松柏木者木臨官寅帝旺卯木既生旺則非柔弱之  
比故曰松柏木也壬辰癸巳長流水者辰為水庫巳為  
金長生之地金生水性已存以庫水而逢生金則泉  
源終不竭故曰長流水也甲午乙未砂石金者午為火

旺之地火旺則金敗未為火衰之地火衰則金冠帶敗而方冠帶未能盛滿故曰砂石金也丙申丁酉山下火者申為地戶酉為日入之門日至此時而藏光故曰山下火也戊戌己亥平地木者戌為原野亥為木生之地夫木生於原野則非一根一株之比故曰平地木也庚子辛丑壁上土者丑雖土家正位而子則水旺之地土見水多則為泥也故曰壁上土也壬寅癸卯金箔金者寅卯為木旺之地木旺則金羸又金絕於寅胎於卯金

既無力故曰金箔金也甲辰乙巳覆燈火者辰為食時  
巳為禺中日之將中豔陽之勢光於天下故曰覆燈火  
也丙午丁未天河水者丙丁屬火午為火旺之地而納  
音乃水水自火出非銀漢不能有也故曰天河水也戊  
申己酉大驛土者申為坤坤為地酉為兌兌為澤戊己  
之土加於坤澤之上非其他浮薄之土也故曰大驛土  
也庚戌辛亥釵釧金者金至戌而衰至亥而病金既衰  
病則誠柔矣故曰釵釧金也壬子癸丑桑柘木者子屬

水丑屬金水方生木金則伐之猶桑柘木也甲寅乙卯  
大溪水者寅為東北維卯為正東水流正東則其性順  
而川澗池沼俱合而歸故曰大溪水也丙辰丁巳沙中  
土者土庫辰絕已而天干丙丁之火至辰冠帶已臨官  
土既庫絕旺火復與生之故曰沙中土也戊午己未天  
上火者午為火旺之地未中之木又復生之火性炎上  
又逢生地故曰天上火也庚申辛酉石榴木者申為七  
月酉為八月此時木則絕矣惟石榴之木反結實故曰

石榴木也壬戌癸亥大海水者水冠帶戌臨官亥水臨官冠帶則力厚矣兼亥為江非他水之比故曰大海水也

納甲

蠡海集云納甲之說自甲為一至壬為九陽數之始終也故歸乾易順數也乙為二至癸為十陰數之始終也故歸坤易逆數也乾一索而得男為震坤一索而得女為巽故庚入震辛入巽乾再索而得男為坎坤再索而



得女為離故戊趨坎已趨離乾三索而得男為艮坤三索而得女為兌故丙從艮丁從兌陽生於北而成於南故乾始甲子而終以壬午陰生於南而成於北故坤始乙未而終以癸丑震巽一索也故庚辛始於子丑坎離再索也故戊己始於寅卯艮兌三索也故丙丁始於辰巳也又一說乾坤者二氣之正位也坎離者二氣之交互也正位則始終全備故甲壬歸乾乙癸歸坤交互則往來處中故戊歸坎己歸離震巽乃受氣之始故庚辛

歸焉艮兌乃生化之終故丙丁歸焉乾坤位陰陽之極  
故子午丑未配於甲壬乙癸父母總攝內外之義震巽  
長男長女為初索是以子丑配庚辛坎離中男中女為  
再索是以寅卯配戊己艮兌少男少女為三索是以辰  
巳配丙丁納之為言受也容受六甲於八卦中也易者  
逆也數皆以逆而推之



納甲直圖

壬  
  
甲

  
丙

  
戊

  
庚

癸  
  
乙


  
丁

  
己

  
辛

考原曰乾納甲壬坤納乙癸乾坤包括始終之義也其餘六卦則自下而上法畫卦者之自下而上也震巽陰陽起於下故震納庚巽納辛坎離陰陽交於中故坎納戊離納己艮兌陰陽極於上故艮納丙兌納丁甲丙戊庚壬為陽干皆納陽卦乙丁己辛癸為陰干皆納陰卦

納甲圖



考原曰此以六卦應月候而坎離為日月之本體居中不用震直生明者一陽始生又生明之時以初昏候之月見庚方也兌直上弦者二陽浸盛又上弦之時以初昏候之月見丁方也乾直望者三陽盛滿又望時以初昏候之月見甲方也巽直生魄則一陰始生又生魄之時以平明候之月見辛方也艮直下弦則二陰浸盛又下弦之時以平明候之月見丙方也坤直晦則三陰盛滿又晦時以平明候之月見乙方也皆與納甲相應

納甲納十二支圖

乾



庚子庚寅子

震



庚子庚寅子

坎



子辰申壬辰寅

艮



寅子辰申壬辰

坤



丙子丙寅卯巳未

巽



卯巳未酉亥丑

離



巳未酉亥丑卯

兌



未酉亥丑卯巳






考原曰此以八卦之六畫分納六辰之法也凡乾在內卦則為甲而納子寅辰如初九為甲子九二為甲寅九三為甲辰也在外卦則為壬而納午申戌如九四為壬午九五為壬申上九為壬戌也凡坤在內卦則為乙而納未巳卯如初六為乙未六二為乙巳六三為乙卯也在外卦則為癸而納丑亥酉如六四為癸丑六五為癸亥上六為癸酉也因乾坤各納兩干故別為內外二卦若震止納庚則初九為庚子六二為庚寅六三為庚辰

九四為庚午六五為庚申上六為庚戌巽止納辛則初  
六為辛丑九二為辛亥九三為辛酉六四為辛未九五  
為辛巳上九為辛卯坎離艮兌四卦依震巽例推之又  
曰納甲之法不知其所自起其以六卦直月候明魄死  
生陰陽消息與先天圖有相似如魏伯陽參同契中所  
陳即其說也參同契曰三日出為爽震庚受西方八日  
兌受丁上弦平如繩十五乾體就盛滿甲東方七八道  
已訖屈折低下降十六轉就統巽辛見平明艮直于丙

南下弦二十三坤乙三十日東北喪其朋節盡相禪與  
繼體復生龍壬癸配甲乙乾坤括始終朱子以為即先  
天之傳孔子之後諸儒失之而方外之流密相付授以  
為丹竈之術耳今按先天之圖八卦俱備而納甲除去  
坎離以為二用則其法亦不盡合或曰說卦言天地定  
位山澤通氣雷風相薄乃以三陽三陰至一陽一陰為  
序而其後方言水火不相射蓋以六卦寓消息而以水  
火為用或者古有此說也至其參錯六辰之法則陽皆

順行陰皆逆轉陰陽之老長中少每差一位惟震與乾  
同者長子繼父體也坤不起於丑而起於未尤與洛書  
耦數起未位後天圖坤居西南樂律林鐘為地統而應  
未月之氣者相合故諸術之中惟納甲為近理今火珠  
林卜卦即其法也



欽定協紀辨方書卷一